

## Jahresbericht des Präsidenten 2021

S Skiweekend u d Wintermeisterschaft im Chorbbau isch am Coronavirus zum Opfer gfaue, bir Papiersammlig im Früehlig hettme fasch chönne meine dr abseit Maskeball z Langethe sigi i Wärrhof verschobe worde, u sogar d Houptversammlig het müesse virtuell düregführt wärde. Wo d' Tage aber langsam länger u wärmer worde si, isch ou bim Sportbetrieb wieder e chly Normalität ygchehrt.

Der Giele-Jugitag het wiederum nid chönne düregführt wärde, derfür hettsech dr TV Choppige aber mitere kreative Lösig gwüss z häufe. Sie hei nämlech e dezentrale Jugitag organisiert, wo jede Verein bi sich deheime het chönne mache, u so hetts fürd Jugeler doch no fürnes sportlechs Summerhighlight glängt.

Dass s Verbandsturnfest z Wange abseit, respektive verschobe worde isch, dass hett niemer würrlech überrascht. Demüetig hei sech d Aktivturner ihrem Schicksau gfüegt.

Ar Bundesfiir ufem Chileplatz isch ändlech wieder mou e Huuch Normalität ir Luft gläge. Dr Turverein hett tatchräftig d Musig ungerstützt und im Service und am Wurstgrill mitgholfe. Ou dr aakündigt Wätterumschwung hett d Stimmig nid chönne trüebe – wo die erste Tropfe gheit si, hettme d Fiirlechkeite churzerhand id Chile verlageret.

Mit grosser Verzögerig isch d Chorbballsaison mit der erste Nati-A Rundi z Büsingen gstartet. Mit zwöi Niederlage und eme knappe Sieg hettme no dütlech Luft gäg ueche gha.

Am 14. Ougste isch mitem schnäuste Madiswiler wieder mou e säuber organisierte Aalass ufem Programm gstange. Die junge si gsprunge u d' Festwirtschaft hett brutzlet und usgschänkt.

Bir nächste Nati-A Rundi, wo am nächste Wuchenänd stattgfunge hett, hett üses Spitzeteam leider nid sini volli Leistig chönne abrüefe. Am Ändi vom Tag hettme sech mit 3 Punkt und em zwöitletschte Tabälleplatz müesse begnüege.

Änds Ougste si üsi Jugeler uf Sulgen ad Schwizermeisterschaft greiset. Trotz em gruusige Wätter, hetts üses U16 Team gschaftt, sech ufs Podest z Kämpfe. Ganz härzlechi Gratulation zur Bronzemedallie!

Die letschti Nati-A Rundi isch schlussändlech aafangs Septämber überd Bühni. Mit er reelle Gfähr vomene mögleche Abstieg im Äcke, heisech üsi Jungs dütlech verbessert u drüü Siege chönne heibringe und dr Ligaerhalt isch glücht. Trotz de Startschwierigkeite aafangs Saison hei üsi Giele dr Gring nid lo hange u hei wieder mou aune zeigt, dasme mit der Macht usem Oberaargou immer u überall muess rächne. Bravo Jungs!

Mit em Schlussturne hei dr Nick Zulliger u dr Roger König ere aute Tradition nöis Läbe yghuuchet. Trotz- oder vilech grad wägem abseite Turnfest het dä Aalass breite Aaklang im Verein gfunge und isch e Erfolg worde, wo definitiv Wiederholigsbedarf het. Merci Nick und Roger für die tolli Organisation!

Im Oktober heisech üsi Juniore im Chorbbau vor der reguläre Rundi müese gägene drohende Abstieg wehre. Das ischne guet glücht und so hettme im Novämber guet chönne id Hallesaison starte.

Während em Herbst hetts wiederum aafoh Bööse mit däm cheibe Corona. Es hettsech scho füreh abzeichnet, dass weder s Oktoberfest no d Rüebeckilbi cha gfiiert wärde. Derfür hetts am Rüebeckilbi es Unihockeyturnier ir Linksmähderhalle gä, wo innerhalb vom Verein, bsungers ou unger de Jüngere Chörbeler, uf grosses Interässe gstosse isch. Zuefälligerwiis hett d Musig a däm Obe ou grad Prob gha

u no dr grösser Zuefau hetts wöue, dass ou es paar Modi vor Chorbballgruppe Madis-Aarwange während ere Wanderig ir Linksmähderhalle verbygluegt hei. U so hettme nachem Sportleche bi Bier u Würstli d Kameradschaft zwüsche de verschiedene Vereine chönne pflüge.

Dernoh hettme mit zuenähmender Impfquote u Testerei wieder einigermasse zwäckmässig chönne Sport mache. Dr Cup ud Hallemeisterschafte im Chorbbau si aagluffe. D Junioremeisterschaft isch aber witerhin ungerbroche gsi, aber me hett denn scho gwusst, dass im März d Saison mit emne letzte Spiutag cha abschlosse wäred. Leider hetts fürs Unihockey düttelech schlächter usgseh, u für üses Team isch dr ganz Straub-Sport-Cup is Wasser gheit.

Wo schliesslech wägder Omikron Variante d Politik isch zum Schluss cho, dass äüä d Spitäler ir Schwiz nüm i akuter Gfahr si, vo Corona-Patiänte übersecklet z wärde, si du d Yschränkige im gseuschaftleche wie ou im Sport drastisch abegfahre worde. Sit denn cha wieder jede wo wott id Halle cho Turne, u sogar d Chorbbaurundine 1. U 2. Liga si mitemne grande Finale z Roggu zumene Schluss cho. D Chorbball Jugi hett die ganzi Saison mit Schwierigkeite z kämpfe gha u so hetts schlussändlech weder bir U14 no bir U16 fürne Podestplatz glängt.

Besser hetts ir 1. u 2. Liga usgseh, dert stöh d Teams vom TV Madis uf i beidne Lige z'oberst ufem Podest. Härzlechi Gratulation!

Und ou im Chorbbaucup chame üsi 1. Mannschaft rüehme, die si nämlech bis i Haubfinal vorgstosse, hei sech aber när müesse gäge TV Nunninge müesse gschlage gäh.

S'Schiweekend isch lang ned klar gsi, obs cha düre gführt wärde. Zum Glück si du när d'Massnahme verschwunde, u so het d'Organisation chönne starte. Bide Termine hets leider nüm viu Uswau gha, drum isches du züitglich mit dr Jugend Schwizzermeisterschaft gsi, was me vorauem mit dr Teilnähmerzau gmerkt het. Mit em Motto "Klein aber Fein" u ä chli Unfau-Päch si mir du nur grad 6 Turner gsi. Was jedoch ar hervorragende Stimmig nüt abdoh het. So hei mir zwe schön warmi Schiitäg z'Grinduwaud dörfe erläbe.

Am 13. März het d Saison fürd Chorbbäueler vo de U21 Juniore, wie scho erwähnt, nach über 3 Monet Ungerbruch, verchürzt amne einzige Spieltag chönne abschlosse wärde. Nach es paar herte Kämpf isches gäge Erschwil zum Showdown cho. De Erschwiler hätt es Unentschiede glängt, d Madiswiler hei auso müesse gwünne. Das heisi mit emne 12:8 ou entscheidend fertig brocht und so hei sech üsi Juniore z'oberst ufs Podest kämpft. Schwizermeister! Gratulation zu dere Glanzleistig!

I danke ganz härzlech am Bärnhard König, Kusi Zougg, Römu Schürch, Stefan Pauli u aune woni vergässe ha, ihri Brichte si i dä Johresbricht Ygflosse.

Füre Trunbetrieb ir Schwiz gseht's düttelech besser uus, aus während de letschte zwöi Johr. I hoffe, dass das eso blibt und wünsche aune e erfougrychi und Unfallfrei Saison.